

SIARAN MEDIA

“POLYCC PERKASA JATI DIRI NEGARA: 700 PELAJAR SERTAI MALPTAAC SIRI 16/2025”

SABAK BERNAM, 11 JULAI 2025 – Malaysia Polytechnics Territorial Army Annual Camp (MALPTAAC) Siri 16/2025 secara rasmi membuka tirainya hari ini di Politeknik Sultan Idris Shah (PSIS), menandakan permulaan kepada program intensif selama 14 hari yang menghimpunkan penyertaan para pelajar dari politeknik seluruh Malaysia.

Program yang akan berlangsung dari 10 hingga 24 Julai 2025 ini disertai oleh lebih 700 pelajar dikalangan 17 politeknik seluruh negara, dengan kerjasama 12 Rejimen Siri 500 Askar Wataniah. Ia dianjurkan oleh Jabatan Pendidikan Politeknik dan Kolej Komuniti (JPPKK) dengan kerjasama Bahagian Pasukan Simpanan (BPS), Markas Tentera Darat dan PSIS selaku pengelola bagi edisi kali ini.

Program ini selaras dengan aspirasi Dasar TVET Negara 2030 dalam membina graduan holistik, berkemahiran tinggi, berdisiplin dan patriotik, serta berupaya menyumbang kepada keselamatan negara melalui latihan ketenteraan berstruktur dan pembangunan kemahiran insaniah secara menyeluruh. Antara aktiviti utama yang akan dijalankan sepanjang kem ini termasuk ujian jalan laju (UJL) lima (5) km, pandu arah, pertandingan menembak, multi relay, pertandingan sukan, kelas operasi dalam kawasan terbina (OBUA) serta pelaksanaan Program Jiwa Murni Madani yang memberi manfaat kepada komuniti setempat.

Kesemua aktiviti ini didedahkan melalui Latihan Ketenteraan yang mana tidak semua masyarakat dapat menimba pengalaman sedemikian. Ini adalah sebahagian daripada proses membentuk kemahiran insaniah dan ketahanan mental serta fizikal yang penting untuk melahirkan graduan berdaya saing. Penglibatan dalam aktiviti-aktiviti ini

juga mengukuhkan semangat patriotik dan nilai kerjasama dalam kalangan mahasiswa TVET.

Program ini juga menjadi medan penting bagi memperkukuh hubungan strategik antara institusi pendidikan tinggi dan Angkatan Tentera Malaysia, serta memperkenalkan elemen pertahanan dan keselamatan dalam pendidikan TVET sebagai nilai tambah kepada pembangunan modal insan negara. Sesi pembukaan MALPTAAC Siri 16/2025 berlangsung dalam suasana penuh semangat patriotik, dengan penyertaan para pegawai tentera, pensyarah, pelajar dan wakil-wakil institusi berkaitan.

Majlis Pembukaan MALPTAAC Siri 16/2025 disempurnakan oleh YBrs. Dr Haji Mohd Daud bin Isa, Pengarah Kanan Akademik, JPPKK. Hadir sama, Ketua Pengarah Bahagian Pasukan Simpanan, Markas Tentera Darat, Brigedier Jeneral Sani Bin S Omar, Pengarah PSIS, Puan Haslinda Abd Hamid, Komander Rejimen 502 Askar Wataniah, Kolonel Haji Ridzwan Bin Shoib, Pegawai Daerah Sabak Bernam, Dato' Orang Kaya Maha Bijaya Orang Besar Daerah Sabak Bernam, Dr. Haji Paridul Adras Bin Ismail dan Pengarah-Pengarah Politeknik Malaysia.

-TAMAT-

**POLITEKNIK SULTAN IDRIS SHAH
KEMENTERIAN PENDIDIKAN TINGGI
10 JULAI 2025**

Dikeluarkan oleh:

Unit Perhubungan dan Komunikasi Korporat
Politeknik Sultan Idris Shah